



**JUDICIAL SYSTEM MONITORING PROGRAMME
PROGRAMAMONITORIZASAUN BA SISTEMA JUDISIÁRIU**

***Komunikadu Imprensa
Tribunál Distritál Dili
30 Janeiru 2015***

Presiza akuzasaun no desizaun apropiadu ba krime violénsia domésika

Iha 27 Janeiru 2015, Tribunál Distritál Dili julga kazu violénsia doméstika ne'ebé komete husi arguidu AS hasoru nia feen, iha Distritu Dili.

Ministériu Públiku akuza katak iha 15 Novembru 2013, iha tuku 09:00 kalan, arguidu lori besikanu baku iha lezada nia matan fukun, lori baliu baku iha lezada nia kidun no lori mós baliu ko'a iha lezada nia kabun. Aktu hirak ne'e kauza lezada hetan bubu iha nia matan fukun, kidun no kanek iha lezada nia kabun.

Kazu ne'e akontese tanba arguidu husu ba lezada atu sira-nain rua ba buka xefe suku nia uma hodi rezolve sira-nia oan fetu nia problema, maibe lezada lakohi. Tanba ne'e arguidu halo ofensa hirak ne'e hasoru lezada.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fizika simples konjuga ho artigu 35 alinea b Lei Kontra Violénsia Doméstika.

“Ministériu Públiku tenke elabora faktus sira ne'ebé constitui krime ne'e ho profunda tuir krime ninia gravidade atu asegura akuzasaun ne'ebé lolos no apropiadu,” dehan Diretór Ezekutivu JSMP, Luis de Oliveira Sampaio.

JSMP hanoin katak faktus sira ne'ebé asosiadu hosi krime ne'e prienxe elementu krime maus tratus ba kónjuje tuir artigu 154 Kódigu Penál ka ofensa ba integridade fízika grave ho intensaun atu hamosu perigu ba nia vida tuir artigu 146 letra (e) Kódigu Penál. Instrumentu ka materiál hirak ne'ebé arguidu uza hodi ezekuta krime ne'e, manifesta arguidu iha intensaun atu hamosu risku ka iha potensia atu hamosu risku seriu ba lezada nia vida. Tuir lolos Ministériu Públiku no Tribunál tenke halo alterasaun ba kualifikasaun krime ne'e atu asegura pena ne'ebé neseriu tuir krime nia gravidade.

Iha tribunál arguidu konfesa katak faktus ne'e loos hotu. Arguidu deklara arepende ba nia hahalok foin premeiraves komete krime no promete sei la repete tan krime hanesan hasoru lezada iha futuro. Tanba arguidu konfesa integralmente ba faktus, Ministériu Públiku husu presindi (la presiza rona) depoimentu husi lezada.

Iha alegasaun finál, ministériu públiku konsidera faktus hotu-hotu provadu tuir konfisaun arguidu nian. Atu halo prevensaun ba krime ne'e atu labele akontese tan iha futuru, Ministériu Públiku husu ba tribunál atu kondena arguidu ho pena prizaun fulan 6 suspende ba tinan 1.

Enkuantu defeza haktuir katak tanba arguidu konfesa, arepnde nia hahalok, diak malu ona ho lezada no foin premeiraves komete krime, tanba ne'e husu ba tribunál atu fo pena ne'ebé kmaan ba arguidu.

Depoisde rona tiha alegasaun husi parte sira, tribunál konklui prosesu ne'e no imediatamente lee desizaun hodi kondena arguidu ho pena prizaun fulan 6 suspende ba tinan 1.

Kazu ne'e rejista iha tribunál ho Nú. prosesu 72/14/TDD. Julgamentu prejide husi Dra. Francisca Cabral, Ministériu Públiku reprezenta husi Dra. Ivonia Maria Guterres no arguidu hetan defeza husi Dr. Sergio Paulo Dias Quintas husi Defensória Públiku.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

telefone: 3323883/77295795

webiste: www.jsmp.tl

facebook www.facebook.com/timorleste.jsmp

twitter: @JSMPtl